

---

OFFERYNNAU STATUDOL CYMRU

---

**2019 Rhif 288 (Cy. 67)**

**CYNLLUNIO GWLAD A THREF, CYMRU**

**Rheoliadau Datblygiadau o Arwyddocâd  
Cenedlaethol (Cymru) (Diwygio) 2019**

<i>Gwnaed</i> - - - -	<i>18 Chwefror 2019</i>
<i>Gosodwyd gerbron Cynulliad Cenedlaethol Cymru</i> - -	<i>20 Chwefror 2019</i>
<i>Yn dod i rym</i> - -	<i>1 Ebrill 2019</i>

Mae Gweinidogion Cymru, drwy arfer y pwerau a roddir i Gynulliad Cenedlaethol Cymru gan adran 321B o Ddeddf Cynllunio Gwlad a Thref 1990(1) ac sydd bellach yn arferadwy ganddynt hwy(2), ac a roddir iddynt gan adran 323A o'r Ddeddf honno(3), a pharagraff 1 o Atodlen 4D iddi, yn gwneud y Rheoliadau a ganlyn:

**Enwi a chychwyn**

1.—(1) Enw'r Rheoliadau hyn yw Rheoliadau Datblygiadau o Arwyddocâd Cenedlaethol (Cymru) (Diwygio) 2019.

(2) Daw'r Rheoliadau hyn i rym ar 1 Ebrill 2019.

**Diwygiadau i Reoliadau Datblygiadau o Arwyddocâd Cenedlaethol (Cymru) 2016**

2.—(1) Mae Rheoliadau Datblygiadau o Arwyddocâd Cenedlaethol (Cymru) 2016(4) wedi eu diwygio fel a ganlyn.

(2) Yn rheoliad 2, yn y diffiniad o "person penodedig" yn lle "rheoliad 11" rhodder "rheoliadau 11 ac 11A".

(3) Ar ôl rheoliad 11, mewnosoder—

---

(1) 1990 p. 8. Mewnosodwyd adran 321B gan adran 81 o Ddeddf Cynllunio a Phrynu Gorfodol 2004 (p. 5).  
(2) Trosglwyddwyd swyddogaethau Cynulliad Cenedlaethol Cymru i Weinidogion Cymru yn rhinwedd paragraff 30 o Atodlen 11 i Ddeddf Llywodraeth Cymru 2006 (p. 32).  
(3) Mewnosodwyd adran 323A gan adran 50 o Ddeddf Cynllunio (Cymru) 2015 ("Deddf 2015"). Mewnosodwyd Atodlen 4D gan baragraff 1 o Atodlen 3 i'r Ddeddf honno.  
(4) O.S. 2016/56 (Cy. 26), a ddiwygiwyd gan O.S. 2017/642 (Cy. 148).

**“Swyddogaethau penodedig: llinellau trydan**

**11A.** Yn ogystal â'r swyddogaethau hynny a ragnodir gan reoliad 11, mae'r swyddogaethau a ganlyn wedi eu rhagnodi at ddibenion paragraff 1 o Atodlen 4D i Ddeddf 1990 mewn cysylltiad â datblygiad o fewn rheoliad 3(1)(ab) o Reoliadau Datblygiadau o Arwyddocâd Cenedlaethol (Meini Prawf Penodedig a Chydsyniadau Eilaidd Rhagnodedig (Cymru) 2016(5)

- (a) swyddogaethau o dan adran 62F o Ddeddf 1990 (datblygiadau o arwyddocâd cenedlaethol: cydsyniadau eilaidd)(6);
  - (b) swyddogaethau o dan adran 62J o Ddeddf 1990 (dyletswydd i roi sylw i adroddiad ar yr effaith leol)(7);
  - (c) penderfynu ar y cais cyn diwedd y cyfnod penderfynu yn unol ag adran 62L(2) o Ddeddf 1990(8);
  - (d) penderfynu ar gais o dan adran 70(1) o Ddeddf 1990(9);
  - (e) swyddogaethau o dan erthyglau 28 a 29 o Orchymyn 2016;
  - (f) swyddogaethau o dan y rheoliadau a ganlyn—
    - (i) rheoliad 19 (mynd ymlaen i benderfynu);
    - (ii) rheoliad 29 (penderfynu);
    - (iii) rheoliad 35 (penderfynu);
    - (iv) rheoliad 36(1) (hysbysiad o benderfyniad).”
- (4) Yn rheoliad 18 cyn paragraff (1) mewnosoder—
- “(A1) Mae'r rheoliad hwn yn gymwys pan fo'r swyddogaeth o benderfynu ar y cais i'w harfer gan Weinidogion Cymru.”
- (5) Ar ôl rheoliad 18 mewnosoder—

**“Adroddiad: llinellau trydan**

**18A.**—(1) Mae'r rheoliad hwn yn gymwys pan fo'r swyddogaeth o benderfynu ar y cais i'w harfer gan berson penodedig.

(2) Rhaid i'r person penodedig wneud adroddiad ysgrifenedig y mae'n rhaid iddo gynnwys casgliadau a phenderfyniad y person penodedig.

(3) Caiff y person penodedig beri i wrandawriad neu ymchwiliad gael ei gynnal os, ar ôl ystyried y sylwadau ysgrifenedig, yw'r person penodedig o'r farn y dylid cymryd i ystyriaeth unrhyw dystiolaeth newydd neu fater newydd o ffaith, nad yw'n fater o bolisi.

(4) Pan fo gwrandawriad neu ymchwiliad i'w gynnal, rhaid i'r person penodedig anfon at y ceisydd, yr awdurdod cynllunio lleol a'r personau sy'n cyflwyno sylwadau ysgrifenedig, ddatganiad ysgrifenedig o'r materion y gwahoddir sylwadau pellach yn eu cylch at ddibenion ystyried y cais ymhellach gan y person penodedig.

(5) Rhaid i'r rhai sy'n gwneud sylwadau pellach sicrhau bod y person penodedig yn cael y cyfryw sylwadau o fewn pa bynnag gyfnod o amser a ddatgenir gan y person penodedig yn y gwahoddiad o dan baragraff (4).

---

(5) O.S. 2016/53 (Cy. 23), a ddiwygiwyd gan O.S. 2016/358 (Cy. 111). Mewnosodwyd rheoliad 3(1)(ab) gan Reoliadau o Arwyddocâd Cenedlaethol (Meini Prawf Penodedig, Ffioedd a Ffioedd am Geisiadau Tybiedig) (Cymru) (Diwygio) 2019 (O.S. 2019/283 (Cy. 65)).

(6) Mewnosodwyd adran 62F gan adran 20 o Ddeddf 2015.

(7) Mewnosodwyd adran 62J gan adran 21 o Ddeddf 2015.

(8) Mewnosodwyd adran 62L gan adran 22 o Ddeddf 2015.

(9) Diwygiwyd adran 70(1) gan baragraff 5 o Atodlen 4 i Ddeddf 2015.

- (6) Mae rheoliad 15(2) i (6) yn gymwys i unrhyw sylwadau pellach a gyflwynir i'r person penodedig yn unol â pharagraff (5), fel pe bai cyfeiriadau at Weinidogion Cymru yn gyfeiriadau at y person penodedig.”
- (6) Yn rheoliad 19(2) yn lle “a ragnodwyd gan reoliadau 15 a 18” rhodder “a ragnodir gan reoliadau 15, 18 a 18A”.
- (7) Yn rheoliad 20(2) yn lle paragraff (c) rhodder—
- “(c) Gweinidogion Cymru neu'r person penodedig wedi peri i wrandawriad gael ei gynnal yn unol â rheoliad 18(5) neu reoliad 18A(3),”
- (8) Yn rheoliad 28 cyn paragraff (1) mewnosoder—
- “(A1) Mae'r rheoliad hwn yn gymwys pan fo'r swyddogaeth o benderfynu ar y cais i'w harfer gan Weinidogion Cymru.”
- (9) Ar ôl rheoliad 28 mewnosoder—

**“Gweithdrefn ac adroddiad ar ôl gwrandawriad: penderfyniad gan berson penodedig**

**28A.**—(1) Mae'r rheoliad hwn yn gymwys pan fo'r swyddogaeth o benderfynu ar y cais i'w harfer gan berson penodedig.

- (2) Ar ôl cau'r gwrandawriad—
- (a) caiff yr asesydd (os penodir un) wneud adroddiad ysgrifenedig i'r person penodedig mewn cysylltiad â'r materion y penodwyd yr asesydd i gynorthwyo gyda hwy;
- (b) rhaid i'r person penodedig wneud adroddiad ysgrifenedig a chynnwys ynddo gasgliadau'r person penodedig a'i benderfyniad.
- (3) Pan fo asesydd yn gwneud adroddiad yn unol â pharagraff (2)(a), rhaid i'r person penodedig—
- (a) ei atodi wrth ei adroddiad; a
- (b) datgan yn yr adroddiad hwnnw i ba raddau y mae'r person penodedig yn cytuno neu'n anghytuno ag adroddiad yr asesydd, a phan fo'r person penodedig yn anghytuno â'r asesydd, ddatgan y rhesymau dros yr anghytundeb hwnnw.
- (4) Wrth wneud y penderfyniad, caiff y person penodedig ddiystyru unrhyw sylwadau ysgrifenedig neu ddogfen arall a geir ar ôl cau'r gwrandawriad.
- (5) Os yw'r person penodedig, ar ôl cau'r gwrandawriad, yn bwriadu cymryd i ystyriaeth unrhyw dystiolaeth newydd neu unrhyw fater newydd o ffaith (nad yw'n fater o bolisi) na chafodd ei godi yn y gwrandawriad ac y mae'r person penodedig yn ystyried ei fod yn faterol berthnasol i'r penderfyniad, ni chaniateir i'r person penodedig ddod i benderfyniad heb yn gyntaf—
- (a) hysbysu'r ceisydd, yr awdurdod cynllunio lleol a'r personau hynny a gyflwynodd sylwadau ysgrifenedig ac a gymerodd ran yn y gwrandawriad; a
- (b) rhoi cyfle iddynt gyflwyno sylwadau ysgrifenedig.
- (6) Rhaid i'r rhai sy'n gwneud sylwadau ysgrifenedig sicrhau bod y person penodedig yn cael y cyfryw sylwadau o fewn y cyfnod a ddatgenir yn hysbysiad y person penodedig o dan baragraff (5)(a).
- (7) Caiff y person penodedig beri bod gwrandawriad yn cael ei ailagor fel yr ystyria'r person yn briodol.
- (8) Pan ailagorir gwrandawriad (pa un ai gan yr un person penodedig neu berson penodedig gwahanol)—

- (a) rhaid i'r person penodedig anfon at y ceisydd, yr awdurdod cynllunio lleol a'r personau hynny a gyflwynodd sylwadau ysgrifenedig neu a gymerodd ran yn y gwrandawriad, ddatganiad ysgrifenedig o'r materion y gwahoddir sylwadau pellach mewn cysylltiad â hwy, at y diben o ystyried y cais ymhellach gan y person penodedig; a
  - (b) mae rheoliad 26 yn gymwys fel pe bai'r cyfeiriadau at wrandawriad yn gyfeiriadau at wrandawriad a ailagorwyd.
- (9) Mae rheoliad 15(2) i (6) yn gymwys i unrhyw dystiolaeth neu sylw ysgrifenedig a gyflwynir i'r person penodedig yn unol â pharagraff (6) o'r rheoliad hwn, fel pe bai cyfeiriadau at Weinidogion Cymru yn gyfeiriadau at y person penodedig.
- (10) Mae rheoliad 29(b) i'w ddarllen fel pe bai cyfeiriad at y cyfnod a ganiateir yn unol â rheoliad 28(6) yn gyfeiriad at y cyfnod a ganiateir yn unol â rheoliad 28A(6)."
- (10) Yn rheoliad 30(3) yn lle "rheoliadau 22 i 25 a 28" rhodder "rheoliadau 22 i 25, 28 a 28A".
- (11) Yn rheoliad 35(b) yn lle "rheoliad 28(6)" rhodder "rheoliad 28(6) neu reoliad 28A(6) (yn y naill achos a'r llall fel y'i cymhwysir gan reoliad 30(3))".
- (12) Yn lle rheoliad 40(1) rhodder—
- “**40.**—(1) Mae'r Rhan hon yn gymwys pan gaiff penderfyniad mewn perthynas â chydysniad eilaidd ei wneud gan—
- (a) Gweinidogion Cymru—
    - (i) yn rhinwedd adran 62F(2) o Ddeddf 1990; neu
    - (ii) o dan unrhyw ddeddfiad arall pan fo Gweinidogion Cymru o'r farn bod y cydysniad eilaidd yn gysylltiedig â chais o dan adran 62D o Ddeddf 1990; neu
  - (b) person penodedig yn rhinwedd rheoliad 11A(a).”
- (13) Yn Atodlen 1—
- (a) yn y testun Cymraeg hepgorer paragraff 8(b).
  - (b) ar ôl paragraff 8 mewnosoder—

**“Gweithdrefn ar ôl ymchwiliad: penderfyniad gan berson penodedig**

**8A.** Rhaid darllen rheoliad 28A (fel y'i cymhwysir i ymchwiliadau gan reoliad 30(3)) fel a ganlyn—

- (a) ar ôl paragraff (3) mewnosoder—
    - “(3A) Pan ystyriwyd dystiolaeth gaeedig yn yr ymchwiliad—
      - (a) rhaid i'r person penodedig a'r asesydd, pan fo un wedi ei benodi, nodi mewn rhan ar wahân o'u hadroddiadau (“y rhan gaeedig”) unrhyw ddisgrifiad o'r dystiolaeth honno ynghyd ag unrhyw gasgliadau neu benderfyniad mewn perthynas â'r dystiolaeth honno; a
      - (b) pan fo asesydd wedi ei benodi, rhaid i'r person penodedig atodi'r rhan gaeedig o adroddiad yr asesydd wrth ran gaeedig adroddiad y person penodedig, a rhaid iddo ddatgan, yn rhan gaeedig yr adroddiad hwnnw, y lefel o gytundeb neu anghytundeb â rhan gaeedig adroddiad yr asesydd, a phan fo anghytundeb â'r asesydd, y rhesymau am yr anghytundeb hwnnw.”
    - (b) ym mharagraff 8(a) ar ôl “ceisydd” mewnosoder “, y cynrychiolydd penodedig”.
- (14) Yn Atodlen 8—

(a) ar ôl paragraff 1(3) mewnosoder—

“(3A) Rhaid i adroddiad y person penodedig o dan reoliadau 18A (adroddiad: llinellau trydan) neu reoliad 28A (gweithdrefn ac adroddiad ar ôl gwrandawriad: penderfyniad gan berson penodedig) gynnwys, yn ychwanegol at gasgliadau a phenderfyniad y person penodedig mewn perthynas â'r cais, argymhelliad neu benderfyniad mewn perthynas â gorchymyn o dan adran 247 o Ddeddf 1990.”

(b) ar ôl paragraff (7) mewnosoder—

“(8) Rhaid darllen rheoliad 28A fel a ganlyn—

- (a) ym mharagraff (4) yn lle “sylwadau ysgrifenedig neu ddogfen arall” rhodder “wrthwynebiad i wneud gorchymyn o dan adran 247 o Ddeddf 1990”;
- (b) ym mharagraff (5) yn lle “a gyflwynodd sylwadau ysgrifenedig” rhodder “a wrthwynebodd wneud gorchymyn o dan adran 247 o Ddeddf 1990”;
- (c) ym mharagraff (8)(a) yn lle “a gyflwynodd sylwadau ysgrifenedig” rhodder “a wrthwynebodd wneud gorchymyn o dan adran 247 o Ddeddf 1990”.

18 Chwefror 2019

*Julie James*  
Y Gweinidog Tai a Llywodraeth Leol, un o  
Weinidogion Cymru

---

## NODYN ESBONIADOL

*(Nid yw'r nodyn hwn yn rhan o'r Rheoliadau)*

Mae'r Rheoliadau hyn yn diwygio Rheoliadau Datblygiadau o Arwyddocâd Cenedlaethol (Cymru) 2016 ("Rheoliadau 2016") mewn perthynas â gwneud penderfyniadau ynghylch ceisiadau am ganiatâd cynllunio i osod llinellau trydan uwchben.

Mae gosod llinellau trydan uwchben sydd â foltedd enwol o 132 KV neu lai ac sy'n gysylltiedig â gorsafoedd cynhyrchu datganoledig yng Nghymru, yn ddatblygiad o arwyddocâd cenedlaethol neu "DAC" yn rhinwedd Rheoliadau Datblygiadau o Arwyddocâd Cenedlaethol (Meini Prawf Penodedig a Chydsyniadau Eilaidd Rhagnodedig) (Cymru) 2016 fel y'u diwygiwyd gan Reoliadau Datblygiadau o Arwyddocâd Cenedlaethol (Meini Prawf Penodedig, Ffioedd a Ffioedd am Geisiadau Tybiedig) (Cymru) (Diwygio) 2019.

O dan baragraff 1 o Atodlen 4D o Ddeddf Cynllunio Gwlad a Thref 1990, caniateir i swyddogaethau penodedig Gweinidogion Cymru mewn perthynas â DAC gael eu cyflawni gan berson a benodir i wneud hynny ar eu rhan ("person penodedig").

Mae rheoliad 2(3) yn mewnosod rheoliad 11A newydd yn Rheoliadau 2016, er mwyn rhagnodi swyddogaethau penodedig mewn cysylltiad â llinellau trydan uwchben.

Mae rheoliad 2(5) yn mewnosod rheoliad 18A newydd, sy'n gwneud darpariaeth ar gyfer adroddiad gan y person penodedig ar ôl i gais gael ei ystyried ar sail sylwadau ysgrifenedig. Mae'r rheoliad 18A newydd hefyd yn caniatáu i'r person penodedig beri i wrandawriad neu ymchwiliad gael ei gynnal os ydyw wedi ystyried tystiolaeth newydd neu faterion newydd o ffaith.

Mae rheoliad 2(6) yn mewnosod rheoliad 28A newydd, sy'n gwneud darpariaeth debyg mewn perthynas â cheisiadau a ystyrir drwy wrandawriad. Mae rheoliad 28A yn ymdrin â'r adroddiad a'r weithdrefn pan fo'r penderfyniad yn cael ei wneud gan y person penodedig. Mae rheoliad 28A hefyd yn gymwys i geisiadau yr ymdrinnir â hwy drwy ymchwiliad.

Mae paragraffau eraill yn rheoliad 2 yn gwneud diwygiadau canlyniadol.

Ystyriwyd Cod Ymarfer Gweinidogion Cymru ar gynnal Asesiadau Effaith Rheoleiddiol mewn perthynas â'r Rheoliadau hyn. O ganlyniad, lluniwyd asesiad effaith rheoleiddiol o'r costau a'r manteision sy'n debygol o ddeillio o gydymffurfio â'r Rheoliadau hyn. Gellir cael copi ar [www.llyw.cymru](http://www.llyw.cymru).